

PROPIS OBILJEŽAVANJA
MEVLUDA

محمد
عليه
السلام

Imam Abdul-Aziz b. Abdullah b. Baz, rhm.

naslov poslanice:

PROPIS OBILJEŽAVANJA MEVLUDA

Imam Abdul-Aziz b. Abdullah b. Baz, rhm.

prijevod: Amir I. Smajić



PRVO IZDANJE

Medina, 1435 / 2014.

U ime Allaha, Svemilosnog, Milostivog!

Zahvala pripada Allahu i neka su salavati i selami na Allahovog Poslanika, njegovu časnu porodicu, ashabe i sve one koji budu slijedili njegovu uputu.

U zadnje vrijeme povećao se broj onih koji pitaju o propisu obilježavanja mevluda¹ Muhammeda, sallallahu alejhi ve sellem, i ustajanja njemu na noge pri donošenju salavata i selama, te drugih djela koja su popratna obilježavanju mevluda.

Kao odgovor na to, kažem da nije dozvoljeno obilježavanje Poslanikovog, sallallahu alejhi ve sellem, rođendana, niti rođendana bilo koje druge osobe, jer se to ubraja u novotarije koje su naknadno uvedene i pripisane vjeri.

Sam Allahov Poslanik, sallallahu alejhi ve sellem, nije obilježavao mevlud, niti su to radile njegove pravedne

¹ Tj. njegovog, sallallahu alejhi ve sellem, rođendana kojeg neuki narod obilježava 12. *rebi'ul-evvela* svake hidžretske godine.

halife², niti iko drugi od ashaba Allahovog Poslanika, sallallahu alejhi ve sellem, radijallahu anhum. To nije radio niko ni od onih koji su došli poslije ashaba iz tri ispravne i odabrane generacije. Oni su najbolje poznavali sunnet³ Allahovog Poslanika, sallallahu alejhi ve sellem, više su ga voljeli i potpunije slijedili njegov plemeniti sunnet od svih onih koji su došli nakon njega.

Vjerodostojnim lancem prenosilaca zabilježeno je od Allahovog Vjerovjesnika, sallallahu alejhi ve sellem, da je rekao: **"Ko u ovu našu vjeru uvede ono što nije od nje, neće mu biti primljeno."**⁴ tj. biće odbačeno.

I rekao je, sallallahu alejhi ve sellem, u drugom hadisu: **"Oporučujem vam moj sunnet i sunnet mojih pravednih halifa nakon mene. Čvrsto se prihvatite toga i stisnite sa svojim kutnjacima. I upozoravam vas na novine u vjeri, jer svaka novina u vjeri je bid'at – novotarija, a svaka novotarija je zabluda."**⁵

² Tj. Ebu Bekr, Omer b. El-Hattab, Osman b. Affan i Alija b. Ebi Talib, radijallahu anhum, koji se smatraju najboljim ashabima.

³ Tj. njegove riječi, djela, uputu, svojstva, osobine i dr.

⁴ Buhari, br. 2697, Muslim, br. 1718, od Aiše, radijallahu anha.

⁵ Ahmed, 4/126-127, Ebu Davud, br. 4607, Tirmizi, br. 2676, Ibn Madže, br. 44, Ibn Hibban, br. 5 i drugi, od Irbada b. Sarije, radijallahu anhu. Hadis je vjerodostojan kao što su rekli Tirmizi, Ebu Nu'ajm, Hakim, Ibn Abdil-Berr, Begavi, Ibn Tejmije, Zehebi, Ibn Redžeb i mnogi dr. Vidi: *Džami'ul-ulumi vel-hikem*, str. 486-487.

U prethodna dva hadisa žestoko je zapriječeno i upozoreno na opasnost uvođenja i rađenja novotarija.

Allah, azze ve dželle, rekao je u Svojoj Jasnoj knjizi: **"... a ono što vam Allahov Poslanik dadne to uzmite, a što vam zabrani to ostavite."**⁶

"Neka se pripaze oni koji postupaju suprotno njegovom naređenju da ih ne pogodi kakva fitna – smutnja ili da ih ne zadesi bolna kazna."⁷

"Vi u Allahovom Poslaniku imate najbolji uzor, za onoga koji se nada Allahovoj milosti i nagradi na onom svijetu, i koji često Allaha spominje."⁸

"Allah je zadovoljan prvim muslimanima, muhadžirima i ensarijama i svima onima koji ih slijede dobra djela čineći, a i oni su zadovoljni Njime; za njih je On pripremio džennetske bašče kroz koje rijeke teku, i oni će vječno i zauvijek u njima boraviti. To je veliki uspjeh."⁹

"Danas sam vašu vjeru usavršio i Svoju blagodat prema vama upotpunio i zadovoljan sam da vam Islam bude vjera."¹⁰

⁶ Prijevod značenja, *El-Hašr*, 7.

⁷ Prijevod značenja, *En-Nur*, 63.

⁸ Prijevod značenja, *El-Ahzab*, 21.

⁹ Prijevod značenja, *Et-Tevbe*, 100.

¹⁰ Prijevod značenja, *El-Ma'ide*, 3.

Ajeti koji govore o ovome su mnogobrojni.

Oni koji obilježavaju mevlud, i njemu slične običaje, kao da žele reći da Uzvišeni Allah nije usavršio i upotpunio vjeru ovom ummetu, i da Allahov Poslanik, sallallahu alejhi ve sellem, nije dostavio i prenijeo ummetu ono što im je potrebno da rade po tome, sve dok nisu došli oni nakon njega i uveli u vjeru ono što Allah nije dozvolio, misleći da je to od djela koja ih približavaju Allahu. U ovome se, bez sumnje, nalazi velika opasnost i nepokornost Allahu i Njegovom Poslaniku, sallallahu alejhi ve sellem.

Uzvišeni Allah je Svojim robovima usavršio vjeru i upotpunio prema njima Svoju blagodat, a Poslanik, sallallahu alejhi ve sellem, dostavio je i prenijeo do nas vjeru jasno i u potpunosti je pojasnio, i nije ostavio ni jedan put koji nas vodi ka Džennetu i udaljava od Vatre a da nam ga nije pojasnio i uputio nas na njega.

Abdullah b. Amr, radijallahu anhuma, u vjerodostojnom hadisu prenosi od Allahovog Poslanika, sallallahu alejhi ve sellem, da je rekao: **"Nije Allah poslao nijednog od vjerovjesnika a da nije imao za obavezu da uputi svoj ummet na ono što je poznavao od dobra za njih i upozori ih na ono što je poznavao od zla po njih."** Hadis je zabilježio Muslim u *Sahihu*.¹¹

¹¹ *Sahih Muslim*, br. 1844.

Svima je poznato da je naš Poslanik, sallallahu alejhi ve sellem, najbolji od svih poslanika i pečat svih vjerovijesnika. On je najpotpuniji od svih ljudi u prenošenju objave od Allaha i najbrižniji u upućivanju savjeta. Pa, da je obilježavanje mevluda od vjere s kojom je Allah zadovoljan za Svoga Poslanika, sallallahu alejhi ve sellem, i njegov ummet, zasigurno bi ga obilježio i sam Allahov Poslanik, sallallahu alejhi ve sellem, za vrijeme svog života, ili bi to uradio barem neko od njegovih ashaba, Allah bio s njima zadovoljan. Kada znamo da se to nije desilo, onda nam biva jasno da je Islam od toga čist. Nasuprot, to je od novotarija u vjeri na koje je Allahov Poslanik, sallallahu alejhi ve sellem, upozorio svoj ummet, kao što je spomenuto u prethodna dva hadisa, a isto značenje preneseno je i u drugim hadisima.

Od tih hadisa su njegove, sallallahu alejhi ve sellem, riječi na džumanskoj hutbi: **"... a zatim, doista je najbolji govor – Allahova knjiga, a najbolja uputa – uputa Muhammeda, sallallahu alejhi ve sellem, a najgore stvari su novine u vjeri, a svaka novotarija (bid'at) je zabluda."** Hadis je zabilježio Muslim u *Sahihu*.¹²

Ajeta i hadisa koji govore o tome ima mnogo.

Velika skupina islamskih učenjaka jasno je porekla dozvoljenost i ispravnost obilježavanja mevluda i

¹² *Sahih Muslim*, br. 867, od Džabira b. Abdullaha, radijallahu anhumu.

upozorila na njega, uzimajući za dokaz spomenute i druge argumente. Drugi od kasnijih učenjaka imali su oprečan stav njima i dozvolili mevlud ako se u njemu ne čini nešto od vjerom pokuđenih i prezrenih radnji, kao pretjerivanje u veličanju Allahovog Poslanika, sallallahu alejhi ve sellem, miješanja između muškaraca i žena, korištenja muzičkih instrumenata za razonodu i zabavu i drugih radnji i djela pokuđenih šerijatom, koji je čist od svega toga. Neki su čak ubijeđeni da se mevlud smatra lijepom novotarijom.¹³

Ali, šerijatsko pravilo nalaže da se ono u čemu se ljudi razilaze od vjere vrati Allahovoj knjizi i sunnetu Allahovog Poslanika, sallallahu alejhi ve sellem. Uzvišeni je rekao: **"O vjernici, pokoravajte se Allahu i pokoravajte se Poslaniku i vašim predvodnicima. A ako se u nečemu razidete, vratite se Allahu i Poslaniku, ako vjerujete u Allaha i Sudnji dan; to vam je bolje i za vas rješenje ljepše."**¹⁴, **"Ma u čemu se razilazili, treba da presudu da Allah."**¹⁵

Mi smo se, da bi saznali propis mevluda, vratili Allahovoj knjizi, pa smo našli da nam naređuje slijedenje Poslanika, sallallahu alejhi ve sellem, u svemu s čime je došao od vjerskih propisa i na što nas je upozorio od

¹³ Ar. *el-bid'atul-hasene*.

¹⁴ Prijevod značenja, *En-Nisa*, 59.

¹⁵ Prijevod značenja, *Eš-Šura*, 10.

zabranjenih stvari, a ujedno nas je, dželle šanuh, obavjestio da je usavršio ovom ummetu njihovu vjeru. U isto vrijeme, znamo da nam Allahov Poslanik, sallallahu alejhi ve sellem, nije propisao obilježavanje mevluda, pa nam biva jasno da nije od vjere koju nam je usavršio Uzvišeni Allah.

Uzvišeni nam je, također, naredio slijeđenje Allahovog Poslanika, sallallahu alejhi ve sellem, u vjeri, i mi smo vratili propis mevluda njegovom sunnetu, pa nismo našli ni u njemu da je obilježavao mevlud, niti da je naredio ili preporučio njegovo obilježavanje, niti su ga obilježavali njegovi plemeniti ashabi, Allah bio s njima zadovoljan.

Iz prethodnog smo zaključili da mevlud nije od vjerom propisanih djela, nego se ubraja u novotarije koje su uvedene u vjeru naknadno i smatra zabranjenim oponašanjem ehlul-kitabija, židova i kršćana, prilikom njihovih praznika.

Jasno je svakom - ko ima i trun pronicljivosti i žudi za slijeđenjem istine a u tome je pravedan - da obilježavanje mevluda nije od vjere Islama, nego je uvedena novotarija koju su nam Allah i Njegov Poslanik, sallallahu alejhi ve sellem, naredili da napustimo.

Ne treba da onaj koji ima razuma bude zaveden mnoštvom onih koji obilježavaju mevlud širom zemaljskih kontinenata, jer se istina ne prepoznaje po

mnoštvu sljedbenika, nego po šerijatskim argumentima. Uzvišeni Allah rekao je o židovima i kršćanima: **"Oni govore da neće ući u Džennet osim ko bude od židova ili kršćana. To su puste želje njihove! Ti reci: Dokaz svoj dajte ako je istina to što govorite."**¹⁶, **"Ako bi se ti pokoravao većini onih koji žive na Zemlji; oni bi te od Allahova puta odvratili."**¹⁷

Zatim, obilježavanje mevluda u većni slučajeva, pored toga što je novotarija, nije pošteđeno i drugih prezrenih i zabranjenih radnji, poput miješanja između muškaraca i žena, slušanja muzike i pjesmi, pijenja opojnih pića i konzumiranja onoga što muti pamet¹⁸ i drugih sličnih zliha pojava.

Nekad se desi i nešto mnogo opasnije od ovoga, a to je činjenje velikog širka. Primjer toga je pretjerivanje u veličanju Allahovog Poslanika, sallallahu alejhi ve sellem, ili nekih od evlija. On, sallallahu alejhi ve sellem, biva dozivan i upućuju mu se dove, traži se od njega pomoć, vjeruje se da on poznaje nevidljivi svijet i ono što će se desiti u budućnosti i druga djela koja su jasno nevjerstvo, a mnogi ljudi ih čine prilikom obilježavanja mevluda posvećenog Allahovom Poslaniku, sallallahu alejhi ve

¹⁶ Prijevod značenja, *El-Bekare*, 111.

¹⁷ Prijevod značenja, *El-En'am*, 10.

¹⁸ Ovo za sada, hvala Allahu, nije prisutno u našim krajevima, ali je rašireno u mnogim muslimanskim zemljama.

sellem, ili nekom drugom od onih koje nazivaju Allahovim evlijama.

Vjerodostojno je preneseno od Allahovog Vjerovjesnika, sallallahu alejhi ve sellem, da je rekao: **"Upozoravam vas na pretjerivanje u vjeri, jer je, doista, pretjerivanje u vjeri uništilo one koji su bili prije vas."**¹⁹

I rekao je, sallallahu alejhi ve sellem: **"Nemojte pretjerivati spram mene kao što su pretjerali kršćani spram sina Merjeminog. Doista, ja sam rob, pa zato recite: 'Allahov rob i Njegov poslanik!'"** Hadis je zabilježio imam Buhari u *Sahihu* od Omera, radijallahu anhu.²⁰

Zaista je čudno da mnogi ljudi ulažu krajnji napor i trud kako bi prisustvovali obilježavanju mevluda, koji je novotarija, i žestoko to opravdavaju, ali u isto vrijeme napuštaju ono što im je Allah, dželle šanuh, naredio, poput obavljanja džuma namaza i ostalih namaza u džematu.²¹ Na ta izrazito bitna djela ne obraćaju pažnju niti smatraju da su grješni radi toga. Razlog tome je, bez

¹⁹ Ahmed, br. 3247, Nesa'i, br. 3087, Ibn Madže, br. 3029 i dr. od Ibn Abbasa, radijallahu anhuma.

²⁰ *Sahihul-Buhari*, br. 3445.

²¹ Mnogi uopšte ne obavljaju namaz, niti išta od islamskih ruknova i šartova, a onda odlaze na mevlud želeći time da iskažu svoju ljubav prema Allahu i Njegovom Poslaniku, sallallahu alejhi ve sellem, što je očita kontradiktornost, da nas Uzvišeni Allah sačuva zablude.

imalo sumnje, slabosti imana (vjerovanja), nedovoljna upućenost i mnoštvo grijeha koji su prekrili njihova srca, Allah oprostio i nama i svim drugim muslimanima.

Neki od onih koji odlaze na mevlude misle da Allahov Poslanik, sallallahu alejhi ve sellem, lično prisustvuje obilježavanju mevluda, i radi toga mu, želeći ukazati počasti i izraziti dobrodošlicu, ustaju na noge. Ovo je od najpokvarenijih izmišljotina i vrhunac neznanja. Allahov Poslanik, sallallahu alejhi ve sellem, neće izaći iz svog kabura prije Sudnjega dana, niti ima ikakvog kontakta s bilo kim od ljudi, niti prisustvuje njihovim okupljanjima, nego boravi u svome kaburu (mezarju) do Sudnjega dana, a njegova duša je na uzvišenom skupu²² kod svoga Gospodara, u Kući plemenitosti.

Uzvišeni Allah rekao je u suri *El-Mu'minun*: **"Vi ćete, poslije toga, pomrijeti, a zatim ćete, na onom svijetu, oživljeni biti."**²³

A Allahov Poslanik, sallallahu alejhi ve sellem, kaže: **"Ja sam prvi čiji će se kabur otvoriti na Sudnjem danu, i prvi koji će se zauzimanti (činiti šefa'at), i prvi čije će zauzimanje biti primljeno."**²⁴ - neka je na njega najbolji salavat i selam od svoga Gospodara.

²² Tj. s melecima bliskim Uzvišenom Allahu, azze ve dželle.

²³ Prijevod značenja, *El-Mu'minun*, 15-16.

²⁴ Muslim, br. 2278, od Ebu Hurejre, radijallahu anhu.

Ovaj plemeniti ajet i hadis, i svi drugi ajeti i hadisi u istom značenju, upućuju da će Allahov Vjerovjesnik, sallallahu alejhi ve sellem, i drugi od mrtvih, biti proživljeni iz kaburova tek na Sudnjem danu. Na tome su jednoglasni svi islamski učenjaci i niko od njih ne suprostavlja se tome.

Svaki musliman dužan je povesti brigu o ovim stvarima i pripaziti se novotarija koje su neznalice nepravedno uvele u vjeru, a o čemu Uzvišeni Allah nije spustio dokaza, a Allah je najbolji pomagač, na Njega se istinski oslanjamo, i nema promjene stanja niti snage osim uz Allahovu pomoć.

Što se tiče nazivanja selama Allahovom Poslaniku, sallallahu alejhi ve sellem, mimo mevluda, to je dobro djelo i smatra se od najboljih pokornosti koje nas približavaju Allahu, jer Uzvišeni je rekao: **"Doista Allah i meleki Njegovi donose salavat na Vjerovjesnika. O vjernici, donosite salavat na njega i vi, i pokorite se u potpunosti!"**²⁵, i kaže Allahov Poslanik, sallallahu alejhi ve sellem: **"Ko na mene donese jedan salavat – Allah na njega donese deset."**²⁶

²⁵ Prijevod značenja, *El-Ahzab*, 56.

²⁶ Muslim, br. 384, od Abdullaha b. Amra, radijallahu anhumu.

Donošenje salavata je propisano u bilo koje vrijeme a pritrđeno na kraju svakog namaza²⁷, čak i obavezno kod nekih islamskih pravnika.

Donositi salavat je sunnetom pritrđeno u mnogim situacijama, kao nakon ezana, prilikom njegovog, sallallahu alejhi ve sellem, spomena, u danu i noći džume (petka), kao što na to upućuju mnogi hadisi.

Allaha molimo da nas, i sve muslimane, uputi na ispravno razumijevanje vjere, da nas učvrsti na njenom slijeđenju, da nas sve počasti slijeđenjem Sunneta i napuštanjem novotarija, doista je On Blagi i Plemeniti.

Neka je Allahov salavat i selam na našeg vjerovjesnika Muhammeda, njegovu časnu porodicu i sve ashabe.²⁸

²⁷ Tj. na zadnjem sjedenju – *tešehhudu*.

²⁸ Ova kratka poslanica štampana je više puta od strane Saudijskog muftijstva i Ministarstva za islamska pitanja i vakufe, a naknadno je, po dozvoli uvaženog šejha, Allah mu se smilovao, uvrštena u njegove sabrane fetve, članke i poslanice *Medžmu'a fetava ve mekalat mutenevi'a*, ili poznatije kao *Medžmu'a fetava Ibn Baz*, 1. tom, str. 178-182.



BESPLATAN PRIMJERAK